

6

Weekend yen di actividadnan di Carnaval

ORANJESTAD - Carnaval 1967 ya a drenta den pensamiento di tur hende na Aruba. E fin di siman aki lo tin e prome actividadnan di e fiesta sin paar aki. Awe nochí lo tin eleccion di prins di carnaval juvenil den Eagle Club, mientras mayan atardi den Trocadero e prins di carnaval grandi lo worde eligi.

En efecto, e actividadnan a cuminsa for di ayera nochí caba. Den Lago Sport Park tabatin e concurso di e mihor interpretador di calypso. Ayera den dia tabatin no menos seis cantante cu a inscribi. E cantidad aki, ta esun mas grandi di e ultimo anjanan. E seisnan cu tabata inscribi te ayera den dia, tabata: "Mighty Pharaó", "Lord Boxo", "Lord Sweet Sweet", "Stinger Ray", "Young Quick Silver y "Mike Fernando".

CONNIE FRANCIS

Na Santa Cruz, e activo organizacion di hobennan "Connie Francis Teeners" a cuminsa pa shet'or di anochí cu un exitoso "jump-up" cual a principia riba e terreno di Winston y -pasando den cayanan di Santa Cruz- a termina den Trappers Club. Despues a sigi un baile den e club cu presentacion di e candidatonan pa reina na e publico y por ultimo eleccion di e reina di Connie Francis Teeners.

PRINS CARNAVAL

E eleccion di Prins Carnaval Juvenil lo tuma lugar den Eagle Club, awe nochí durante un fiesta bailable. Asina leu cu nos a ser informa, Goldfinger Society y Caribe Club lo manda nan prins y pancho, mientras cu awe den dia ta ser spera cu mas club lo manda nan candidatonan.

E candidatonan di "Goldfinger Society", un agrupacion joven cu e anja aki lo tuma parti activo den carnaval, ta prins "Sangura" (Gerrit Vis) y su pancho "Lembe Lembe" (Raymundo Gonzalez).

Mayan atardi e eleccion di e prins grandi lo tuma lugar den Trocadero durante un fiesta bailable for di 3'or di atardi pa 8'or di anochí. E candidatonan cu ya a inscribi ta:

Prins Troe y su pancho La La (Ochle Oduber y Egbert Ponson) di Club Caribe, prins Paper Clips y pancho Potloot (Richard Luydens y Leopoldo Croes) di Club Estrella, prins Dodo y pancho Jaco (Dodo-Jaco) di Orquidea Club (Winsor Janga y Robby Jansen), prins Porkchop cu pancho Spare-ribs (Juan Geerman y Lucas Gomez) di Bonaire Club, prins Albertico Lamoenchi y pancho Renzo Mandarin (Francisco Rojas y Vero "Boechi" Maduro) di "Los Vets Softballclub".

Segun informacionnan obteni, Aruba Tivoli Club tambe lo manda su candidato, di manera cu por acepta cu lo tin por lo menos seis prins cu lo competi pa e titulo. Esaki caba ta un cantidad cu ta mas grandi cu tur e anjanan anterior. Te ainda por duna nomber di candidatonan te 8'or awe nochí na e secretario di Stichting Arubaanse Carnaval, tel. 1233.